



Inatsisartunut ilaasortaq
Mariane Paviassen Jensen, Inuit Ataqatigiit
/ Maani

01-07-2025
Sags nr. 2024 - 2150Akt
nr. 25430544

Postboks 1340
3900 Nuuk
Tlf. (+299) 34 50 00
E-mail: nap@nanoq.gl
www.naalakkersuisut.gl

**Kalaallit Nunaata nunasiatut inissisimajunnaarfiani pisut qulaajarneqarnissaat
pillugu § 37 naapertorlugu apeqqummut nr. 053-2025-mut akissut**

Asasara Mariane,

Apeqqutinnut qujanaq. Nunatta nunasiatut inissisimajunnaarfiani pisut qulaajarneqarnissaat pillugu 2025-mi maajip 26-ani Naalakkersuisunut apeqquteqarputit.

Apeqqut 3 aamma 4 Peqqissutsimut inunnullu Innarluutilinnut Naalakkersuisup aamma Meeqqanut, Inuusuttunut Ilaqutariinnullu Naalakkersuisup susassaqafigimmatikkrit, apeqqutitut taakkununga immersueqataatippakka. Apeqqut 1 aamma 2 uanga akissuteqarfigaakka.

- 1. Inatsisartut UPA 2022-imi imm. 110-mi aalajangiinerminni Naalakkersuisut peqquneqarput Nunatta nunasiatut inissisimajunnaarfiani pisut qulaanarneqassasut, piffissamilu pineqartumi Naalagaaffiit peqatigiit nunasiaataajunnaarsitsinissamik piumasaqaataat Danmarkimit malinneqarsimanersut misissuiffiqineqassasoq, tamannali suliaq sulii aallartinngitsoq tusagassiorfitsigut paasivarput, suliaq aallartinniarlugu Naalakkersuisut qanoq iliuuseqarpat?**

Akissut

Sorsunnersuup aappaanit ullumikkumut Nunatta, Danmarkillu akornanni pisimasut pillugit oqaluttuarisaanermi nassuiaasoqarnissaa aallartinneqassasoq aalajangiillutik, ataatsimoorussamik nalunaarut Naalakkersuisut aamma Danmarkimi naalakkersuisut 2022-mi juunip 9-ani atsiorpaat.

Nunatta, Danmarkillu akornanni pissutsit pillugit oqaluttuarisaanermik qulaajaanissamik suliaq pillugu Naalakkersuisut, Danmarkimilu naalakkersuisut 2023-mi juunip 22-ani isumaqatigiissiorput. Ilisimatusarfinni tunngaveqassalluni ilisimatusarnissami sinaakkutissat tamarmiusut suliaq summi nassuiaatigineqarput. Danmarkimi naalakkersuisut 45 mio. koruuninik aningaasaliippat, taakkualu oqaluttuarisaanermik qulaajaanissamut Naalakkersuisut atugassanngortissallugit.

Oqaluttuarisaanermik qulaajaanissami ilisimatusarnermi aqutsisussat 2024-mi februaarip 20-ani toqqarneqarput. Ilisimatusarnermi aqutsisussat ataani atsiortumit aamma Danmarkimi Ilinniartitaanermut, Ilisimatusarnermullu ministerimit toqqarneqarput.

Qulaajaanissaq sulii aallartinneqarsimannginnerarlugu tusagassiutini ataasiaannanngitsumik ilanngutassiaqarnikuvoq. Suliap paamaarnarneranut peqqutaasut ilagivaat, suliaq summi malillugu, suliaq toqqarneqarsimammat Kalaallit Nunaat Danmarkilu ataatsimoorlutik ilisimatusarnermut aqutsisussanik toqqaasimammata Ilisimatusarfinni atasussanik. Ilutigisaanik suliniutip immikkut illuinnartumik iluseqarnera Naalakkersuisut aamma Danmarkimi Ilinniartitaanermut, Ilisimatusarnermullu ministeriaqarfiup suleqatiginnerisigut

ineriartortinneqarpoq. Taassumap saniatigut suleqatigiit suliaqarsimapput ilisimatusarnermi aqutsisut Ilisimatusarfiup ataani sulinissaannut sinaakkutissanik inissiinissamut.

Piffissap ingerlanerani 2022-mi Danmarkimi folketingimut qinersisoqarnera piffissamik atuiffiusimasut ilagaat, tamannalu suliaqarsimamut qaammatinik arlalinnik kinguartitsilluni, soorluttaaq Nunatsinni Naalakkersuisuni tunngaveqarfigisaanik susassaarfik allannguiffigineqarsimallunilu sulisut taarserarsimasut. Kingullertut aamma 2025-p upernaani Nunatsinni Inatsisartunut qinersisoqarpoq, suliniutillu aallartinneqarnissaanik tamanna aamma qaammatinik marlussunnik kinguartitsilluni.

2. Qaqagu Ilisimatusarfiup suliniummut missingersuutit pillugit ilisimatusarnermi aqutsisunik isumaqatigiissuteqarnissaa naammassineqassava?

Akissut

Suliaqarsimamut naapertorlugu Ilisimatusarfiup aamma ilisimatusarnermi aqutsisut akornanni isumaqatigiissuteqarnerup kingusinnerpaamik ukiut tallimat qaangiunnerini nassuiaat tamarmiusoq kalaallisut, qallunaatullu Naalakkersuisunut aamma Danmarkimi naalakkersuisunut tunniunneqassaaq.

Suliniut aallartivitsinnagu kingullertut Ilisimatusarfik, ilisimatusarnermi aqutsisunut isumaqatigiissusiortussaavoq. Tassunga tunngatillugu Ilisimatusarfiup, ilisimatusarnermilu aqutsisut isumaqatigiinnissaannut ikiorserneqarnissaat pillugu Nunanut Allanut Ilisimatusarnermullu Naalakkersuisoqarfik Ilinniartitaanermut, Ilisimatusarnermullu ministeriaqarfik oqaloqatigalugu suliaqarpoq. Taamaakkaluartoq Ilisimatusarfiup aamma ilisimatusarnermi aqutsisut akornanni isumaqatigiinninniarneq pineqarmat, Naalakkersuisut ullormik aalajangersimasumik taasisinnaangillat.

3. Naalakkersuisut uppersarsinnaavaat inatsisitigut ataataqanngitsunut tunngatillugu ikiorsiinarluni aningaasaliissutut utertinneqarsimanerat?

Akissut

Apeqqu 3 akisinnaaqullugu suliaq pineqartoq Meeqqanut, Inuusuttunut Ilaqutariinnullu Naalakkersuisup susassaqarfiata ataaniimmat taanna immersueqataatippara: ”Tarnip pissusiinik ilisimasalimmit ikiorserneqarnissamut neqeroorummik atuisut ikingaatsiarnersigut, suliniummullu aningaasaliissutaasut naleqqunnerpaamik atorneqarnissaannik inatsisitigut ataataqanngitsut peqatigiiffiata kissaateqarneratigut Naalakkersuisut siunnersuutiginiikuuaat, eqqartuussiveqarfinni sulisunik piginnaanngorsaasitsinermik aallartitsisoqassasoq. Sinerissami eqqartuussiveqarfinnut saaffiginninnerup ajornannginnerulernissaa siunertaavoq. Tamanna tunuliaqutaralugu aalajangerneqarpoq, eqqartuussiveqarfinni sulisunik piginnaanngorsaasissamut aningaasat 2023-mi sinneruttut atorneqassasut, taamaalillunilu Inatsisit Atuutsinneqarnerannut suliaqarfinnut tunniunneqarlutik. Tamanna pillugu inatsisitigut ataataqanngitsut peqatigiiffiat 2023-mi aggustip 25-ani allakkamik nassinneqarput.

Inatsisitigut ataataqanngitsunut neqeroorutissanik, suliniutissanillu nutaanik aallartitsinissamut periarfissaq Naalakkersuisut misissuleruttorpaat.”

A. Akissut aappiuppat suna tunngavingalugu utertinneqarpat?

Akissut

Siuliani akissut takuuk.

4. **Naalakkersuisut uppersarsinnaavaat naartunaveersaasorsorneqarsimasut oqaloqaleqartarnissaannut periarfissiinniarluni aningaasaliissutut utertinneqarsimanerat?**

Akissut

Apeqqu 4 akisinnaaqullugu suliaq pineqartoq Meeqqanut, Inuusuttunut Ilaqutariinnullu

Naalakkersuisup susassaqrifiata ataaniimmat taanna immersueqataatippara:

”Aningaasat tapiissutit eqqarsaatigalugit utertitsisoqarnikuunngilaq. 2023-mi 800.000 koruunit tapiissutigineqarput, ukiullu tulliini tapiissuteqartoqarani.”

A. Akissut aappiuppat suna tunngavigalugu utertinneqarpat?

Akissut

Siuliani akissut takuuk.

Neriuppunga qulaani allaqqasuni apeqquaqatitit akineqartut.

Inussiarnersumik inuulluaqqusillunga



Vivian Motzfeldt